



Groupe parlementaire

Här Claude Wiseler  
President vun der Deputéiertechamber  
19, um Krautmaart  
L-1728 Lëtzebuerg

Lëtzebuerg, den 23. Abrëll 2024

Här President,

esou wéi d'Chambersreglement et virgesäit, bieden ech lech, dës parlamentaresch Fro un den Här Banneminister weiderzeleeden.

Am Ëmfeld vun de Lycéeën kënn et geheeft zu Fäll vu Gewalt, Bedrohungen, Drogekonsum, Erpressung, Déifstall etc. Et ass evident, datt am Sënn vun enger transparenter Opklärung vun dese Virfäll a fir esou dës negativ Phänomener kënnen ze bekämpfen déi néideg Analysen a Statistike mussen duerchgefouert ginn.

An deem Kontext hätt ech follgend Froen un den Här Minister:

1. Ass den Här Minister averstanen domat, datt déi zoustänneg Autoritéite musse kënnen op déi néideg Statistiken an Daten zeréckgräifen, fir kënnen kriminell Delikter effizient ze bekämpfen?
2. Kann den Här Minister matdeelen, wéi dacks d'Police am leschte Schouljoer huet missen an de Lycéeën intervenéieren? Vu datt follgend Informatiounen net géint den Dateschutz verstoussen: Kann den Här Minister opschlësselen, a wéi enge Lycéeën d'Police hätt missen intervenéieren a wéi dacks?
3. Kann den Här Minister opschlësselen, wéi vill Schüler dat lescht Schouljoer aus wéi enge Lycéeën hu misse verwise ginn? Kann de Minister eenzel opschlësselen, wat d'Grënn hefir waren?
4. Kann den Här Minister bestätegen, datt all Staatsbeamten, respektiv Staatsugestallten, deen an engem Lycée schafft laut sengem Statut beim Verdacht vun enger Strofdot, ewéi Gewalt, Déifstall, Drogekonsum, Erpressung etc. dozou verpflichtet ass, d'Police ze alertéieren?

Mat déiwem Respekt,



Fred Keup  
Deputéierten



**Gemeinsam Äntwert vum Här Inneminister, Léon Gloden, an dem Minister fir Educatioun, Kanner a Jugend, Claude Meisch, op d'parlamentaresch Fro Nr. 646 vum 23. Abrëll 2024 vum honorabelen Deputéierte Fred Keup zum Sujet "Violence au lycée"**

**Fro 1**

Et ass generell wichteg fir d'Police, dass si kann, am Respekt vum legale Kader, op Informatiounen zrëckzegräife fir hir Missiounen ze erfëllen.

Aus der Fro vum Här Deputéierte geet net ervir wei eng Donnéeë oder Statistike spezifesch viséiert sinn.

**Fro 2**

D'Police kann net matdeelen, wéi dacks se am leschte Schouljoer an de Lycéeën intervenéiert huet, well dës Informatiounen net statistesch an den Datebanken esou erfaasst ginn. Eng automatiséiert Recherche, déi sech exklusiv op Interventiounen an de Schoule baséiert, respektiv de betraffene Lycée als Krittär erkennt, ass net méiglech.

Eng Nofro vum Educatiounsministère an de Lycéeën huet erginn, datt et insgesamt eng 120 Interventioune vun de Servicer vun der Police gouf. Allerdéngs erfaassen och d'Schoulen dës Interventiounen net systematesch, esou datt verschiddener just eng Schätzung konnte virhuelen; ausserdeem sinn d'Grënn vun den Interventioune ganz ënnerschiddlech a schliisslech ass och net gewosst, op wem seng Initiativ et zu enger Interventioun vun der Police koum. Eng Opschlësselung no Lycéeën ergëtt deemno kee Sënn.

**Fro 3**

Am Schouljoer 2022/2023 ass 251 Mol eng Schülerin oder e Schüler vun der Schoul verwise ginn.

Wei schonn an der Äntwert op d'parlamentaresch Fro Nr. 6834 präziséiert, ass d'Zuel vun de Schoulverweiser pro Lycée e Renseignement, deen aus Dateschutzgrënn net ka kommunizéiert ginn, well de Risiko besteet, datt e Schüler op déi Manéier kéint identifiziéiert ginn.

D'Grënn, déi zu engem Verweis gefouert ginn, baséieren sech op den Artikel 43 vum Lycéesgesetz (*loi modifiée du 25 juin 2004 portant organisation des lycées*) a ginn aus folgendem Tableau ervir:



Grënn	Unzuel
<i>« les voies de fait, l'incitation à la violence, la menace et les actes de violence commis à l'égard d'un membre de la communauté scolaire »</i>	63
<i>« l'insulte grave »</i>	19
<i>« l'enregistrement ou la diffusion de scènes de violence ou d'humiliation concernant les personnes de la communauté scolaire »</i>	5
<i>« l'atteinte aux bonnes mœurs »</i>	1
<i>« le port d'armes »</i>	5
<i>« les incitations et agissements discriminatoires, de nature xénophobe ou envers l'appartenance ethnique, le sexe ou l'identité du genre, le handicap, l'âge, l'orientation sexuelle, la religion »</i>	2
<i>« le harcèlement moral ou sexuel »</i>	7
<i>« la dégradation ou la destruction de propriétés au détriment soit de l'Etat, soit de particuliers »</i>	8
<i>« le vol dans l'enceinte du lycée ou lors d'un déplacement scolaire ou d'une activité périscolaire »</i>	14
<i>« le faux en écriture, la falsification de documents »</i>	2
<i>« le refus d'observer les mesures de sécurité »</i>	2
<i>« le déclenchement d'une fausse alerte ou l'annonce d'un danger inexistant avec l'intention de déclencher une fausse alerte »</i>	2
<i>« la présence répétée au lycée en état d'ébriété ou sous l'emprise de stupéfiants prohibés »</i>	1
<i>« la détention ou la consommation ou le trafic, dans l'enceinte du lycée, de stupéfiants prohibés »</i>	11
<i>« l'absence injustifiée des cours durant plus de soixante leçons au cours d'une même année scolaire ou plus de trente leçons pour les élèves des classes concomitantes »</i>	104
<i>« trois exclusions, pendant une même année scolaire, de tous les cours pour chaque fois au moins une journée; à la suite de la deuxième exclusion, l'élève majeur ou les parents de l'élève mineur sont avertis par écrit qu'en cas de récidive le renvoi est possible »</i>	29



Et ass ze ënnersträichen, datt a vereenzelte Fäll e puer Grënn zu engem Verweis gefouert hunn, an dofir den Total vun de Grënn méi héich ass, wei den Total vun de Verweiser.

#### Fro 4

Den Artikel 23 aus dem Code de procédure pénale definéiert, a wéi engem Fall e Signalement un de Parquet muss gemaach ginn:

*« Toute autorité constituée, tout officier public ou fonctionnaire, ainsi que tout salarié ou agent chargés d'une mission de service public, qu'il soit engagé ou mandaté en vertu de dispositions de droit public ou de droit privé, qui, dans l'exercice de ses fonctions, acquiert la connaissance de faits susceptibles de constituer un crime ou un délit, est tenu d'en donner avis sans délai au procureur d'Etat et de transmettre à ce magistrat tous les renseignements, procès-verbaux et actes qui y sont relatifs, et cela nonobstant toute règle de confidentialité ou de secret professionnel lui étant applicable le cas échéant. »*

Am Joer 2018 hunn d'Ministère vum der Educatioun, der Justiz an der Santé ee Guide erausginn, deen déi komplex Froe ronderëm Jugendschutz, Dateschutz, Vertraulichkeet a Signalement erlääuert an deen als Richtlinn gëllt (*Maltraitance de mineur : Procédures à suivre par les professionnels de l'Enfance et de la Jeunesse*).

An de Lycéeë goufen ab der Rentrée scolaire 2023 "Coordinateurs Addiction" agefouert, déi eng Expertis am Beräich vun der Suchtpräventioun an der Suchtinterventioun hunn an déi am Lycée an och fir extern Partner Uspriechpersoun sinn am Kontext vum Konsum an dem Trafic vu legalen an illegalen Drogen. An hiren Tâchen ass virgesinn, datt si de Lien maachen tëschent der Schoul, den externe Partner vun der Drogepräventioun, der Prise en charge thérapeutique an der Police. Bei ausgefouerte Strofdote muss d'Police ëmmer alertéiert ginn.

Lëtzebuerg, den 4. Juni 2024  
Den Inneminister  
(s.) Léon GLODEN